

KUALA
LUMPUR
2017

TISSOT UCI

HKT TISSOT

AZIZULHASNI AWANG

CHEONG JUN HOONG

AL JUFFERI
JAMARI

Tiga jaguh dunia bawa bendera

Oleh SUFIAN HADI SOJAK
sukan@utusan.com.my

■ KUALA LUMPUR 7 OGOS

SUKAN SEA Ke-29 bakal menyaksikan kelainan apabila tiga juara dunia iaitu Azizulhasni Awang, Cheong Jun Hoong dan Al Jufferi Jamari diberi penghormatan sebagai pembawa Jalur Gemilang dalam upacara pembukaan pada 19 Ogos ini.

Pengumuman tersebut dibuat oleh Menteri Belia dan Sukan,

Khairy Jamaluddin selepas menghadiri majlis perhimpunan akhir kontinjen Malaysia menjelang temasya dwitahunan itu di sebuah hotel, di sini malam ini.

"Saya nak umumkan pembawa bendera kontinjen negara. Setelah saya memikirkan perkara ini begitu lama, kita ada buat sedikit kelainan untuk Sukan SEA kali ini."

"Kita akan ada tiga pembawa bendera. Kesemuanya merupakan juara dunia. Ini satu penghormatan kepada mereka. Ketiga-

tiganya adalah Azizulhasni, Jun Hoong dan Al Jufferi," katanya.

Azizulhasni merupakan juara berbasikal keirin dunia yang dimenanginya di Hong Kong April lalu. Dia juga merupakan pemenang pingat gangsa Sukan Olimpik di Rio de Janeiro, Brazil tahun lalu dan pernah memikul tanggungjawab membawa Jalur Gemilang ketika majlis pembukaan Sukan Olimpik di Beijing pada 2008.

Jun Hoong pula mencipta kejutan apabila memenangi pingat

emas kejohanan terjun dunia di Budapest, Hungary dalam acara 10 meter platform individu. Dia turut memenangi pingat perak, bergandingan dengan Pandelela Rinong dalam disiplin sama.

Al Jufferi pula merupakan juara dunia tiga kali berturut-turut dalam kelas Putra E.

Ketiga-tiga mereka diletakkan harapan untuk memenangi pingat emas dalam Sukan SEA kali ini.

Sementara itu, Khairy berkata beliau melihat semangat juang kontinjen negara kian membara

dan mereka telah bersedia untuk bertarung dalam temasya itu yang akan berlangsung 11 hari lagi.

"Saya ingatkan mereka untuk buat yang terbaik demi negara, diri sendiri, keluarga, jurulatih dan untuk semua orang."

"Mereka memahami dan saya rasa perkara ini bukan tekanan kepada mereka sebaliknya boleh dijadikan motivasi," katanya.

Sementara itu, Al Jufferi berkata, dia tidak menyangka diberi penghargaan untuk menjadi salah seorang pembawa Jalur

Gemilang dan berharap perkara tersebut dapat menyuntik semangatnya untuk memenangi pingat emas.

"Terima kasih saya ucapan kepada Menteri Belia dan Sukan sebab beri peluang untuk saya bawa bendera. Sekarang saya memang tak sabar nak mulakan Sukan SEA. Kalau boleh esok juga. Tetapi pakar psikologi kata, cuba kawal keterujaan ini supaya tak berlebihan dan mengelak daripada mengalami kecederaan," katanya.

